

milia il Re donò de intrada a la comunità di Milan, et si trovasse chi prestasse fino a la festa di la Resurrection.

*Di Spagna, di l' Orator nostro, di 2, date a Saragosa di Ragon.* Scrive, come l' oferta fata per quel re Catholico in materia christiana par non si fazi altra preparation, e vol dal Papa li danari de le decime, e di quelli spender in questo per esser in gran bisogno esso Re. Et zà si dice ha speso il subsidio li fo dà di quel regno quando el vene, ch'è ducati 550 milia, a pagarli in tre anni, li qual à impegnati per servirsi di danari à speso, si per le noze di la sorela nel re di Portogal, come in mandar suo fradelo don Ferando in Fiandra. Poi in mandar in Alemagna a li electori per farsi Re di romani, ch'è stati ducati 200 milia; et sa certo lui Orator è stà fato cambi per mandar diti danari, quali dieno esser in Alemagna a . . . a di 20 Zener, et pagarli poi lo April a chi li dirà con 8 per 100 di danno; ma voria tornando fusse con 4 per 100 solamente, che saria segnal ancora non fusse firmato Re di romani. Scrive, è *letere di Portogal*. Dil zonzer di la sorela li, per il che il Re manda uno nontio alegrarsi con quella Maestà de le noze etc. *Item*, esso Orator scrive si spazi el suo successor etc. Et prima avisa, come quelli di le ripresaje zà comenzavano a dir si appropinquava il tempo di tre mexi.

*Dil dito, di 8.* Come riceveve letere di 9 Novembre zerca si perlongi el termine di 3 mesi a le ripresaje, et si manderà persona instruta etc. Parlò al Gran canzelier di questo. Disse li desse uno memorial e bisognava tratar questa cossa ne li Consigli de justicia; et che questi tre mexi fo dati costa al Re più di ducati 200, perchè fa le spese a quelli domanda raxon di questo; *tamen* vederia etc. Scrive poi, visitò el cardenal Egidio legato, qual li ha ditto che il Re et monsignor di Clevers li ha ditto vol mandar oratori al Papa, et persuader Soa Santità tutti li principi mandino a jurar le trieve quinquennale; e lui Legato ha ditto non bisognava mandasse, perchè zà sono li oratori di tutti, dicendo questo Re ha fato quelle oblation per non esser manco dil re Christianissimo, ma par con lui. *Item*, scrive esso Orator ha parlato al reverendo episcopo Argomantense, uno di oratori del re d' Ingaltera sono li a la corte, qual è per partirse e va Ingaltera; reterà l'altro. Et par questo Re vol intrar in l'acordo fato con Franza; ma per esser uno capitolo, li principi . . . siano acetadi, voria fusse moderato; et l'Imperador ha mandato il suo; mandato Ingaltera, per voler intrar in dito acordo. *Item*, monsignor di

Clevers vol il re Catholico mandi una onorata ambasata in questa dieta si fa in Alemagna. *Item*, scrive a di 6 riceveve nostre di 18 et 22; da matina va a palazo per parlar al Re per aver cussi auto ordine di aver audientia.

*Di Anglia, di l' Orator nostro, date a Lambi a di 3.* Come ha ricevuto nostre letere, di 3 dil passato, con tante laude a le operation sue, che tien non sia tale che meriti cussi esser exaltato; ma dubita sia come li ochiali; che vardando per quelli si vede cosse mazor di quelle sono. Non ha potuto parlar al Re, ni al cardenal Eboracense. Sono fuora; fin 5 zorni tornerano, et exequirà etc. Scrive haver parlato al cardenal Campeze legato, qual li ha ditto *inter loquendum* do cosse: Come in materia christiana etc., *ut in litteris*, non da conto; l'altra, che il re Catholico è in nova pratica di noze in la fia dil re di Portogallo etc., et il re di Spagna vol mandar zente in Italia fenendo contra turchi, ma forsi a qualche altro effecto. Et lauda molto dito Cardenal, dicendo saria bon la Signoria li scrivesse una bona letera. Scrive, l' orator francese è li, è venuto a visitarlo etc. Solicita la expedition dil suo successor aziò possi repatriar.

*Di sier Vincenzo Zantani vice capitano di le galie di Fiandra, date in Anversa a di primo Dezembroio.* Scrive dil garbujo li fu fato per non esser stà dà in nota quello era su le galie; *unde* conzò la cossa con dar ducati 150, e questo fo a di 27 dil passato, et nomina li borgimaistri. Et a di 22 dito seguì il garbujo; sichè in 5 zorni conzò la cosa. Et scrive, fenno certi giudicii nominati in le letere. Et come quelli borgimaistri hanno fato bon officio, et si ricomandano a la Signoria nostra; sichè si tirerà fuora dil canal per levarsi col nome di Dio per andar in Fiandra, dove ha scritto le galie si metti in ordene, aziò zonto el sia de li e spirata la muda, se possi levar e partirsi.

Fu prima stridati tutti quelli dieno andar questi tre mexi che vien acompagnar la Signoria, soto pena di ducati 3, nel numero di qual lo Marin Sanuto fui cavato etc.

Fo tolto, lezendo le letere, el scurtinio di 3 Savii di Terra ferma, in luogo di sier Justinian Morexini, sier Zuan da Canal et sier Piero Contarini, che compieno. Tolti numero 37, et volendosi balotar non fu servato l'ordine di chiamar li Censori a darli sagramento, come vol la leze; ma ben numerato il Consejo, fono date numero 215. Et volendo balotar, li Censori mandono Hironimo di Alberti suo nodaro suso, et feno lezer una condanason fata per loro con-